

ping. Producit hæc regio flores Gensuminos, folium Cha optimum, poma aurea omnis generis; concinnantque incolæ pannos ex crudo cannabe, à Sinis Co dicitur, quamquam hæc potius alterius herbæ species, quam Cannabis videatur.

Montes. Pic mons altissimus ad Australem urbis partem est.

Mocing mons prope Yangy, saxis horridus ac præruptus, ascensuque difficilis, pluribusque obscurioribus antris hinc inde excavatus.

Quarta Urbs

L V N G L I.

IAcet hæc urbs ad Sintien urbis occasum, sub se duo habet castra: 1 Pingfa, 2 Taping. Monticolæ ex assiduo cum Sinis commercio aliquid paulatim induerunt ex Sinicis moribus, adhuc tamen semper armati incedunt, bellisque delectantur, & arma magnificiunt. habet urbs ad Notolybicum pontem satis magnificum lapideum, Quangcy dictum.

Montes. Jungtao mons maximus prope Pingfa est: & ad Taping est mons Cohia inaccessus, & saxeus totus.

M V N I M E N T A.

Sequuntur modo munimenta varia, per totam provinciam sparsa ad itinerum custodiam, ne monticolæ viatores invadant, ac incautos opprimant; quod tamen adhuc sæpe faciunt, præcipue quando offenduntur à Sinis. hæc autem munimenta sunt sequentia: 1 Picie, 2 Gueicing, 3 Ganchoang, 4 Cingping, 5 Pingpa, 6 Gannan, 7 Ufa, 8 Hinglung, 9 Chexúi, 10 Caili. De singulis hic, quod notatu dignum reperero, breviter subijciam.

Ad Picie occidentalem partem supra profundissimam vallem, per quam torrens ingenti aquarum in præceps ruentium lapsu, atque impetu volvitur, ut viam sternerent Sinæ, crassissimis ferreis catenis annulos aliquos ita hamis, uncisque ex utraque montium parte firmarunt, ut superimpositis asseribus pontem efformarint.

Pons ex ferreis catenis.

Pingpa castrum unicum in hac provincia est, quod magnam obtinet planitiem, quantam scilicet capere potest longissime extensa oculorum acies: amoeni illic sunt ac fera-

ces oryzæ campi: circa Uma etiam pulchræ sunt, fœcundæque planities.

Mohi mons ad ortum Picie saxosus pror-
Montes. fus, atque horridus: in eo unica patet via, equitis unius capax, ad longissimum spatium extensa, utrimque latera montis veluti parietes ad perpendiculum erecti assurgunt.

Lochung mons prope Cingping ad Borealem partem, è regione montis Kocung, in his frequentes habitant monticolæ.

Loco mons, hoc est cervi cornua, à præruptis scilicet, extantibusque hinc inde lapidibus monti nomen inditum.

Vily mons ad Gannan Australem partem, cujus vertex continua nube coöpertus esse, observatus est.

Ibidem ad occasum est Peki mons, collibus constans non minus altis, quam nemorosis.

In munimento Picie fons scaturit aquæ
Flumina. amœnissimæ, Fo dicitur: ibidem ad ortum aqua ex monte decidit ingenti fragore.

Ad Ganchoang catadupa, seu præceps fluvii lapsus est, deciditque tota vis aquæ ad altitudinem duodecim perticarum.

Intra mœnia Cingping lacus parvus est, Cifeng dictus, ex quo incolæ aquam ad usus necessarios hauriunt, cum ob saxorum intercurrentium molem ac duritiem puteum nullum ibi effodere illis liceat. Puon fluvius ad ortum Gannan fluit: ad Australem munimenti partem est fons aquæ dulcissimæ, Pelo dictus.

Sunt & aliqua alia loca minoris notæ, munita tamen, à Sinis custodita, suoque quælibet præfecto commissa; qui accuratam omnium locorum suæ curæ traditorum, apud se solet adservare tabulam, quod per totam Sinam apud omnes præfectos moris est; unde vix credo accuratiores ulla in regione locorum omnium esse tabulas, & observationes. Hæc isthic munimenta per omnia loca sunt, per quæ patet iter, quibus monticolæ reprimere, imo & subigere tentant Sinæ. nomina præcipuorum locorum sunt: 1 Jungning, 2 Xúitúng, 3 Lokeu, 4 Xangtang, 5 Vatieu, 6 Hoanglien, 7 Cugni. reliquorum nomina dabunt mappæ.

Ad Borealem partem Xúitúng est Xe-
Montes. tung mons, in quo ingens est caverna; reliqua se habent uti exprimuntur in mappis: multa enim studio relinquo, ne ignotis nominibus paginas impleam.